

*clare, distincte, & perfecte videret.* Non est enim id factum confortatione quadam, & elevatione naturalis oculorum aciei, sed raptu quodam Spiritus, Stephanum implentis, agentisque, eique coelos apertos, atque in his, stantem a dextris Dei Jesum ostendentis.

*Sedere, an beatitudo?*

Resp.

§. 5. Iam pergamus cum Cornelio. Quosdam Patrum ait respondere: *sedere ad dextram Dei idem esse quod habitare in gloria caelesti, quomodo omnes Beati sedent a dextris Dei. Sed hoc non sufficit: hic enim praeter aliis sanctis proprium aliquid Christo tribuitur.* Utique solius hoc est Christi, sedere in dextra Dei, qui & solus ascendit super omnes coelos, ut, sedens in dextra Omnipotentis, omniaque, quae in caelo & in terra sunt, sua maiestate gloriaque implentis, impleret omnia. Sedet tamen & Christus in dextra Dei beatus, sed beatitudine ea, qua beatus Deus est. Unde beatitudinis Christi, & beatitudinis sanctorum, differentia apparet.

*Sedere, an aequalis maiestas?*

§. 6. Ait ergo secundo Cornelius, alios passim Patres putare, *per sedere hic significari aequalem maiestatem Filii cum patre, scilicet divinam, quam quiete & pacifice cum patre possideat, & simul cum eo regnet quasi summus rex & dominus omnium, simili modo Dei maiestas alibi describitur &c. Hoc verum est, sed non ADÆQUATUM, nec maxime intentum in scriptura.* Patet enim tam scripturam, quam symbolum Apostolicum hanc sessionem tribuere Christo HOMINI, postquam resurrexit & ascendit in caelum.

Resp. 1.

§. 7. 1. *Si verum est, sedere hic significare aequalem cum Patre maiestatem, scilicet divinam, divinum regnum & dominium; ut vero adæquatum sit, Christo id homini esse tribuendum; iam deprehensa veritas est, & aperte manifestata simplicitas fidei nostrae & confessionis, quae asserit; Sessione Christi ad dextram Dei, significari divinum regnum a Christo homine acceptum.* Haec pura fidei confessio id habet, quod vel Cornelio ipso iudice, & VERUM est, & ADÆQUATUM. 2. Et haec fuit multorum Patrum, quos prima allegavit disputatio, quae & eorum clara verba excerpit, explicatio, & sententia. Namque isti de Christo homine, de carne nostra loquuntur, & sessionis honorem *ισότημον, ὁμότιμον, aequalem & eundem cum Patre, explicant.* 3. Adhuc Patrum, quos allegat quidem, sed deserit Cornelius, ea autoritas est apud Bellarminum,